


# AWIG - AWIG

DESA ADAT

PATOLAN



DESA PERING

KECAMATAN BLAHBATUH

KABUPATEN DATI II GIANYAR

BALINAN

AWIG - AWIG

DESA ADAT

FATOLAN

\*

\*

\* \* \*

\* \* \*

\* \* \*

\* \* \*

\* \* \*

\* \* \*

\* \* \*

\* \* \*

\* \* \*

\* \* \*

\*

\*

DESA PERING

KECAMATAN BLAHBATUH

KABUPATEN DATI II GIANJAR

P I D A G I N G  
 MAKA BANTANG AWIG-AWIG DESA ADAT  
 P A T O L A N

---

Widangan

KATATTWANING DESA ADAT PATOLAN

PRALAMBANG DESA ADAT PATOLAN

SASANTHI DESA ADAT PATOLAN

MURDA - CITTA

SARGA I ARAN LAN WAWIDANGAN DESA

SARGA II PATITIS LAN PAMIKUKUH

SARGA III SUKERTA TATA PARRAMAN

|          |                             |    |
|----------|-----------------------------|----|
| Palet 1  | Indik Krema .....           | 2  |
| Palet 2  | Indik Prajuru Desa .....    | 4  |
| Palet 3  | Indik Kulkul .....          | 6  |
| Palet 4  | Indik Paruman .....         | 6  |
| Palet 5  | Indik Druwen Desa .....     | 8  |
| Palet 6  | Sukerta Famitegep .....     | 9  |
| Kaping 1 | Karang, Tegal lan Carik ... | 9  |
| Kaping 2 | Papayonan .....             | 10 |
| Kaping 3 | Wawangunan .....            | 11 |
| Kaping 4 | Wawalungan .....            | 11 |
| Kaping 5 | Bhaya .....                 | 12 |
| Kaping 6 | Panyanggiran Banjar .....   | 13 |

SARGA IV SUKERTA TATA AGAMA


|         |                           |    |
|---------|---------------------------|----|
| Palet 1 | Indik Dewa Yadnya .....   | 14 |
| Palet 2 | Indik Resi Yadnya .....   | 18 |
| Palet 3 | Indik Pitra Yadnya .....  | 18 |
| Palet 4 | Indik Manusa Yadnya ..... | 23 |
| Palet 5 | Indik Bhuta Yadnya .....  | 24 |

|       |      |                           |                          |
|-------|------|---------------------------|--------------------------|
| SARGA | V    | SUKERTA TATA PAWONGAN     |                          |
|       |      | Palet 1                   | Indik Pawiwahan ..... 26 |
|       |      | Palet 2                   | Indik Nyapihan ..... 28  |
|       |      | Palet 3                   | Indik Santana ..... 30   |
|       |      | Palet 4                   | Indik Warisan ..... 32   |
| SARGA | VI   | WICARA LAN PAMIDANDA      |                          |
|       |      | Palet 1                   | Indik Wicara ..... 34    |
|       |      | Palet 2                   | Indik Pamidanda ..... 35 |
| SARGA | VII  | NGUWAH-NGUWUHIN AWIG-AWIG |                          |
| SARGA | VIII | P A M U P U T             |                          |

## I KATATTWANING DESA ADAT PATOLAN

Desa Adat Patolan sampun wenten sakeng ngawit kawentenan "Empu Matolan" jenek ring Desa Patolan, kasarengan antuk swogotronya muah para sisyanya. Duk warsa Icaka "Sunya Asti Goni Tunggal" ( 1380 Icaka utawi warsa 1458 Masehi ) ngawit makarya pasraman lan payogan sane mawasta Kahyangan Tapaksidi, raris ngelantur ngawangun Kahyangan Tiga. Mawiwit sakeng iriki raris Desa inucap kawastanin "Desa Adat Patolan". Manut kawentenan Desa Adat Patolan, kacihnayang antuk kawentenang harta pusaka minakadi : Swamba ( Pawedan ), Teken, Tombak pengawin lan sane sewosan, tur ngantos mangkin kasungang utawi kasuciang olih Mangku Gede Patolan pinaka pewaris leluhurnya.

## II PRALAMBANG DESA ADAT PATOLAN



SALINAN AWIG-AWIG DESA ADAT PATOLAN

A. Piteges pralamabang luire :

1. Ongkara mapiteges, astiti bhakti ring Ida Sanghyang Widhi Wasa
2. Padmasana mapiteges, Briana agung
3. Suwamba mapiteges, Dharma
4. Tombak utawi pengawin mapiteges, pakayun utawi tatujon
5. Teken mapiteges, pangenter utawi panuntun
6. Pari miwah kapas mapiteges, kertha raharja utawi gemah ripah loh jinawe
7. Pita mapiteges, pangiket pakilitan utawi pasikian krama
8. Panca siku utawi segi lima mapiteges, pancasila miwah panca sradha.

b. Pakuwub pralambang mapiteges :

Desa Adat Patolan, setata astiti bhakti ring Ida Sanghyang Widhi Wasa saha ngutamayang pakilitan krama lan pasikian kayun, ngulati paras paros pasarpanaya salunglung sabayantaka, turmaning ngamanggehang Dharma Nagara lan Dharma Agama, pinaka pangenter utawi panuntun gumanti prasida ngamolihan tatujon tata tentram kerta reharja gemah ripah loh jinawe, kadasarin antuk Pancasila miwah Panca sradha.

III SASANTHI DESA ADAT PATOLAN

"Satya Wira Dharma Bhakti" mapiteges : teguh ring kajujuran manggen utawi anut ring sajeroning maraga patut.

## MURDA CITTA

AUM, OM

Om Swastyastu, Om awighnemastu nama sidhem,  
putusing Sabha Krama Desa Adat Patolan gumawe Awig-awig  
Desa Pakraman maka sepat siku-siku pamatut wastu kasidan  
prayojanan mami kabeh prasana anghidep mwah amanggehaken  
kadi linging Awig-awig iki.

## SARGA I

## ARAN LAN WAWIDANGAN DESA

Pawos 1

- ( 1 ) Desa Adat puniki mawasta Desa Adat Patolan
- ( 2 ) Jebar kakuwub wawidangannya mawates nyatur :
  - a. Sisi Wetan Desa Adat Keramas
  - b. Sisi Kulon Desa Adat Pering
  - c. Sisi Lor Desa Adat Sema
  - d. Sisi Kidul Segara.
- ( 3 ) Desa Adat Puniki kawangun antuk karang ayahan Desa  
miwah karang gunakaya sane wantah tunggil Banjar  
ingih punika Banjar Patolan.

## SARGA II

## PATITIS LAN PAMIKUKUH

Pawos 2

- Desa Adat Patolan ngamanggehang pamikukuh minakadi :
- a. Pancasila
  - b. Undang-undang Dasar 1945 pemekas pasal 18
  - c. Perda Propinsi Daerah Tk.I Bali Nomor 06 Tahun 1986
  - d. Tri Hita Karana manut sada cara Agama Hindu.

Pawos 3

- Luwir Patitis Desa Adat Patolan :
- a. mikukuhin miwah ngarajegang Sanghyang Agama
  - b. Nginggilang tata prawertine magama

c. ngarajegang kasukertan Desa saha pawonganya sekala  
lawan niskala.

### SARGA III

#### SUKERTA TATA PAKRAMAN

Palet 1

Pawos 4

( 1 ) Sane kabawos Krama Desa inggih punika kula warga  
sane magama Hindu ngamong karang Desa miwah karang  
gunakaya.

( 2 ) Sajaba punika sinanggeh tamiu.

Pawos 5

Krama Desa wenten 4 (petang) soroh, luwire :

- a. Krama ngarep, kulawarga sane patut nyeledin ayah  
reramanya
- b. Krama panganten, kulawarga sane nenten pinaka  
panyeledihin ayah reramanya sakewanten sampun  
mawiwaha
- c. Krama balu, kulawarga sane lanang nenten madruwe ayah  
istri utawi kulawarga sane istri nenten madruwe ayah  
lanang
- d. Krama tapukan, kulawarga manut aksara a utawi b ring  
ajeng sakewanten durung antes ngayah.

Pawos 6

Kawit dados Krama Desa :

- a. Sangkaning ngamong karang Desa utawi karang gunakaya  
sane tunggil banjar
- b. Mawiwit pawiwahan.

Pawos 7

Panamayan tedun makrama Desa :

- a. Nyabran Buda Kelion Dunggulan saha majalaran antuk

**SALINAN ANIG-ANIG DESA ADAT PATOLAN**

tatengeran sadereng arep ring Krama sane ngamongin karang ayahan Desa

b. Nyantos 4 (petang) Galungan mawiwit pawiwahanya.

Pawos 8

Sahanan Krama Desa sami keni tategenan mekadi ayah-ayah miwah papeson, luire :

- a. Krama ngarep lan Krama penganten ; keni rarampen miwah ayah lan urunan mamungkul
- b. Krama balu ; keni urunan mamungkul, rarampen miwah ayahan saparo manut babalunya
- c. Krama tapukan ; keni urunan mamungkul prade madruwe pangupajiwa, luput urunan yaning nenten madruwe pangupajiwa miwah suang-suang luput sakeng ayahan
- d. Prade rikalaning ngayah, wenten sinalih tunggil Krama matilar sadereng puput karya wenang krama inucap keni pamidanda tanjek lalar manut pararem.

Pawos 9

Krama Desa kadadosang :

- a. Mapuwangkid utawi nenten tedun :
  1. Rikala mapawangun, ngeraahin, meyadnya, nandur utawi mamulih, matepetin, kaluasan, dekot lan siosan punika manut pararem
  2. Kengin tempo wantah apisan, sajawanin wenten uak-uakan Prajuru Desa.
- b. Nyada, mapiteges ngamademang ayah, risampun mayusa 70 warsa sangkaning pinunas ngeraga tur nenten dados nyuksukan.
- c. Nyada utawi nyuksukin, tur sane kawenangan risampun manggeh deha taruna mayusa 17 warsa utawi mrasidayang nganutin Krama.

- d. Nutug ayah antuk harta brana saantukan kapialang,  
utawi ngentos ayahan antuk harta brana manawi kajudi  
olih dang mawangrat lan siosan punika manut pararem.

Pawos 10

Wusan dados Krama Desa, luire :

a. Sangkaning :

1. Pinunas ngraga manawi kesah kadura Desa utawi  
ngalangkungin segara
2. Kanorayang duwaning sampun nenten prasida ngesehin  
solah maprawerti satata lempas ring kecaping  
Awig-awig.

b. Sang wusan makrama :

1. Patut ngaturang karang ayahan ke Desa utawi ke  
Krama ngarep
2. Nenten polih pah-pahan sangkaning padruweyan Desa
3. Wusan dados Krama Desa, prade mawali tedun makrama  
malih keni pamopog manut pararem
4. Yan nenten makrama desa, tatkala kalayusekaran  
yening ipun magama Hindu kadadosang ngangge setra,  
sakewanten keni pananjung batu manut pararem.

Palet 2

Prajuru Desa

Pawos 11

( 1 ) Desa Adat Patolan Kaenter olih Bandesa Adat.

( 2 ) Banjar kaenter olih Kelihan Banjar.

( 3 ) Bandesa lan Kelihan Banjar patut :

a. Mawiwit sakeng Krama Desa

b. Kaadegang malarapan antuk kacatri ring paruman  
Desa nyabran 5 (limang) warsa, sajawanin wenten  
parindikan sewos tur dados kacatri malih

c. Maduluran Dewa saksi ring pura Bale Agung.

SALINAN AWIG-AWIG DESA ADAT PATOLAN

## Pawos 12

- ( 1 ) Bandesa Adat kasangga olih :
- a. Patajuh utawi pangliman pinaka wakilnya
  - b. Panyarikan pinaka juru surat
  - c. Patengen pinaka pangemong druwen Desa
  - d. Kasinoman pinaka juru arah.
- ( 2 ) Kasinoman akehnya manut kawigunan, magilir nyabran sasih.
- ( 3 ) Sajeroning ngenterang kasukertan niskala Bandesa mingsinghihang Pamangku Kahyangan Desa, utawi sang rumaga sulingih.

## Pawos 13

- ( 1 ) Swadharmaning Bandesa Adat luire :
- a. Ngenterang pamargin sadaging Awig-awig miwah pararem Desa
  - b. Nuntun tur ngenterang krama rawuhin warga Desa ngupadi manut patitis
  - c. Mawosin kalih niwakang pamutus arep ring wicara warga Desa
  - d. Maka Duta Desa matemuang bawos ring sapa sira ugi.
- ( 2 ) Prade Prajuru iwang panglaksana keni pamidanda nikel ring kaiwangan krama suang-suang, saha kangkat kararianang manut pararem.

## Pawos 14

Patias utawi olih-olihan Prajuru Desa, luwire :

- a. Luput rerampen utawi papeson
- b. Polih tanding tengah
- c. Patias sewosan manut pararem

## Pawos 15

( 1 ) Prajuru Desa kagentosin riantukan :

1. Seda
2. Kanorayang duwaning iwang pamargi utawi nilar  
sesana
3. Wit sakeng pikayun rahayu utawi pinunas ngeraga.

( 2 ) Nganorayang utawi ngentosin prajuru patut sajeroning paruman tur kaingkupin olih Krama Desa.

## Palet 3

## Indik Kulkul

## Pawos 16

( 1 ) Kulkul ring Desa Adat Patolan, luire :

- a. Kulkul Desa utawi Banjar
- b. Kulkul Sekeha-sekeha.

( 2 ) Tabuh tatepakan kulkul Banjar utawi Desa :

- a. Kalih tuludan bamban, tatengeran tedun ngayah  
lan nedunan Banjar.
- b. Ping lima bamban, tatengeran nglekadang utawi  
umbasrare.
- c. Ping kalih bamban, tatengeran ngerorod utawi  
papadikan.
- d. Tatengeran kulkul baya :
  1. Atuludan bulus lantang, tatengeran Jiwa bhaya  
lan Harta bhaya
  2. Petang tuludan bulus, tatengeran Geni bhaya.
- e. Apisan, tatengeran kalayu sekar utawi seda.
- f. Ping tiga lamban, tatengeran ngawangdeang karya  
utawi ngawangdeang patedunan Banjar.

## Palet 4

## Indik Paruman

## Pawos 18

- ( 1 ) Paruman utawi sangkepan ring Desa Adat Patolan, wenten :
- a. Paruman Desa/Banjar, kawentenang :
    1. Nyabran ngasasih, maka cihna tanpa arah-arah dwaning sampun tetep panamaya manut pararem
    2. Napkala ( patgatakala ) maka jalaran arah-arah manut tatujon.
  - b. Sangkepan Prajuru Desa kawentenang manut wiguna
  - c. Paruman Sekelha-sekeha manut pabuat.
- ( 2 ) Paruman Desa utawi Banjar madudonan sakadi ring sor
- a. Prasida lumaksana risampun olih Sang patut ngamiletin kamanggala antuk tatengeran kulkul miwah mabusana adat madya, saha tan kalugra makta gagawan sakaluire
  - b. Tan maren ngarcana ring Ida Bagawan Panyarikan, makasarana widhi widana banten cane.
  - c. Maka pangawit kalaksanayang pawacak tur nawur cingkreman manut pararem.
  - d. Tan kalugra ngawetuang suara gora utawi biyota, vaning wenten asapunika keni pamidanda beya pacamil kadi dandaning nguman-nguman ring sabha, manut pararem.
- ( 3 ) Prade pidaging paruman nenten kaingkupin mangda Prajuru Desa ngilikang babawos, saha pamitusnya kasobyahang mangda kararemin olih krama Desa, bilih tan prasida kasungkemin jantos ping tiga, Prajuru Desa wenang nunas bawos ring sang ngawenang.

#### Pawos 19

- ( 1 ) Sajeroning paruman Desa, Bandesa patut nyobyahang pamargi ngenterang Desa, pamekas nganinin indik :
- a. Munjuk lungsur pakraman saha ayah-ayahnya, sulur

barta brana druwen Desa.

b. Rarincikan Prajuru nganinin usaha Desa kapungkur.

( 2 ) Pamutus paruman Desa sinanggeh pararem maka pamitegep Awig-awig.

Pawos 20

( 1 ) Sangkepan Prajuru Desa madruwe kawenangan wantah ngarincikang pangrancana usaha Desa kapungkur.

( 2 ) Sangkepan Prajuru Desa nenten kawenang ngawedalan tategenan ring krama sadereng kaingkupin olih krama Desa.

( 3 ) Pamutus sangkepan Prajuru Desa ngawetuang paswara, maka pidaging pituduh sang ngawenang utawi ngonekang pecak pararem krama Desa.

Palet 5

Indik Druwen Desa

Pawos 21

Padruweyan Desa Adat Patolan, sekadi ring sor :

a. Kahyangan Desa luire :

1. Kahyangan tiga
2. Pura Sedahan Banjar utawi Melanting
3. Pura Sidempati.

b. Karang ayahan Desa, wenten 46 karang ayahan

c. Pelaba Pura utawi carik.

d. Bale Banjar.

e. Setra.

f. Lalanguan makadi :

1. Tatabuhan Gong
2. Ilen-ilen wali pura : Rejang, Pendet, Remas.

Pawos 22

Piolih-olihan Desa Adat Patolan, luire :

a. Piolihan sakeng palaba Pura

- b. Piolihan urunan sakeng Krama Desa
- c. Piolihan sakeng usaha Desa
- d. Piolihan paica sakeng guru Wisesa
- e. Piolihan sakeng paica-paica sewosan sane patut.

Pawos 23

- ( 1 ) Prajuru Desa wewang ngetangan paupon carik lan sapanunggalan druwen Desa.
- ( 2 ) Pikolih lan paupunya kaanggen prabeya piodalan baha wawangunan ring Pura lan Desa utawi Banjar.
- ( 3 ) Nyabran paruman utawi sangkepan Desa, prajuru pangemong druwen nyihnayang parindik munjuk-lungsuring padruweyan Desa ring krama Desa.
- ( 4 ) Sakaluirin druwen Desa patut wenten ilikitanya.
- ( 5 ) Tan kalugra ngadol utawi ngesahang padruwen Desa, yan tan kasungkemin olih Krama Desa.

Palet 6

Sukerta Panibogep

Kaping 1

Dawos 24

Karang, Tegat lan Carik

- ( 1 ) Krama Desa Pangemong Karang Desa (tanah sane nenten keni tigasana), patut ngwatesin karang inucap antuk pagehan utawi tembok mangda pakantenanya asri.
- ( 2 ) Wates sisi kaler miwah kangin, patut kakaryanin olih sane ngamong ayahane inucap, sane mawasta magaleng kaluan. Tanah Pacatu, Carik utawi tanah padruweyan ngraga sane kapiara wantah gagaleng kateben.
- ( 3 ) Prade karasayang wates pagehan utawi tembok inucap ngalikadin, yaning pada arsa panyandinge kengin watese ngangge pinget kewanten, kasaksinin olih prajuru Desa utawi pracihna antuk paal saking sang ngawewenang.

( 4 ) Prade wenten karang kabebeng utawi embet mangda kautsahayang pamarginya.

( 5 ) Krama Desa nenten dadar ngadol karang ayahan Desa.

Pawos 25

( 1 ) Sinalih tunggil krama Desa utawi Banjar nenten kalugra :

a. Ngalah-alah margi, tegal, carik lan sapanunggadanya.

b. Ngalah-alah Kahyangan, Setra miwah sekancan linggih sane kasinanggeh suci.

( 2 ) Prade wenten sakadi ring ajeng, sang ngalah-alah patut ngawaliang tanah inucap saha keni pamidanda, kadulurin upakara ring tanah inucap manut pararem.

Kaping 2

P a p a y o n a n

Pawos 26

( 1 ) Ngawit nandur papayonan tanem tuwuh, sakirangnya adepa agung (kalih meter) ngajeroang sakeng wates, prade jantos ngaliwat wates wenang kasepat gantungin.

( 2 ) Yaning wenten tatanduran ngungkulin, semaliha wastu mayaning kapisaga patut kawara antuk paiguman ping ajeng mangda prasida sang nruwenang wit, ngebah utawi notor.

( 3 ) Prade sampun kawara talar nenten wenten usaha sang nruwenang wit, sang rumasa katetehan utawi kajerihin wenang masadok ring Prajuru tur risampun kaparitatas kalugra ngicalang wit inucap, sakewanten patin papayonan punika patut katawur manut pararem.

( 4 ) Sang keni pamidanda panyangaskara saha prabeaya manut pararem arep ring wawangunan sang karubuhan,

luire :

- a. Sang nruwenang wit sinanggeh mayanin, prade pungkak ngarubuhin wawangunan krama sewosan
- b. Sang notor, munggul utawi ngebah kayu tur ngarubuhin krama sewosan.

( 5 ) Krama Desa patut ngamanggehang kawerdian tanem tuwuh sangawinang Desane asri.

Kaping 3

W a w a n g u n a n

Pawos 27

( 1 ) Nyabran ngawangun patut :

- a. Masadok ring Prajuru Desa, prade wawangunan inucap nganininwates
- b. Nganggé asta bumi miwah asta kosala-kosali, sanistane manut ring patitis niskala
- c. Nenten nyayubin kapiwaga

( 2 ) Prade wawangunan jantos nyayubin, bilih-bilih tembok ring telengin wates, risampun kawara tur kasadokang ring prajuru kagubar utawi sanistane mangda kakaryanang abangan.

Kaping 4

W a w a l u n g a n

pawos 28

( 1 ) Sahanan warga Desa sane mamiara wawalungan bawi utawi banteng, patut nitenin negul utawi nglogor mangda nenten ngarusak utawi pabianan krama sewosan, bilih-bilih jantos nganjing ngaletihin Kahyangan.

( 2 ) Prade wenten wawalungan malubar utawi ngeleb ngarusak pakarangan utawi paabianan krama sewosan, risampun kawara kengin kataban tur kadanda kawaliang wit sane karusak saha nawur panebas papiaraan tatabanan manut pararem.

- ( 3 ) Prade jantos ngaletihin linggih suci, minakadi pamrajan utawi sanggah risampun kaparitatas olih Prajuru, wenang sang nruwenang kadanda mabuhu agung utawi panca sato maulu bebek blangkalung.
- ( 4 ) Prade jantos ngaletihin linggih suci minakadi Kahyangan Desa utawi pura Pamaksan risampun kaparitatas olih Prajuru Desa wenang sang nruwenang kadanda mabuhu panca kelud anista.
- ( 5 ) Krama Desa patut nyanggra wawalungan miwah sarwa parani, nenten kpatut mademan paksi, nuba ulam miwah sane sewosan, yaning wenten kadi asapunika keni pamidanda manut pararem.

Kaping 5

B h a y a

Pawos 29

- ( 1 ) Parindik bhaya, laire : Geni bhaya, Jiwa bhaya, Harta bhaya, Duracara ring Agama.
- ( 2 ) Sang manggihin sahanan jiwa bhaya, patut nepak kulkul bulus mapitulung manut pawos 16 (2) d.1.
- ( 3 ) Prade ring Desa kahanan jiwa bhaya, patut Desane ngaturang bhuta yadnya tur sang sane mayanin kaaturang ring sang ngawewenang.
- ( 4 ) Prade wenten jadma mamisuh utawi nguman-nguman mantuk ring jadma sewosan kakenanin pamidanda beya pacanli bebasan prayascita tur jadma punika nunas pangampura ring ajeng Krama Desa

Pawos 30

- ( 1 ) Sang manggihin sahanan harta bhaya maling utawi parampokan patut nepak kulkul mapitulung manut pawos 16(2)d.1 utawi sang kamalingan/karampokan a-tur supeksa ring Prajuru Desa sane pacang nimbangan utawi midanda manut pararem maweweh panyangaskara.

- Prade wenten jadma ngamaling harta kasinanggeh suci, sang malaksana katur ring sang ngawawenang.
- ( 2 ) Pratingkahe mapailon ring dusta kabawos saruron, prade wenten jadma manggihin maling nenten nyadokang ring Prajuru jantos jadma sewosan nyaduang, patut keni pamidanda pateh kadi maling, tur jantos ping tiga malaksana asapunika wenang kasukserahang ring sang ngawawenang.
- ( 3 ) Prade wenten jadma ngarereh raramon nenten masadok ring sang nruwenang wit, yaning kacunduk utawi katara patut kadanda kadi maling.
- ( 4 ) Prade wenten jadma ngranjing kapakubon wiadin pakarangan rikala suwang, mawastu sang nruwenang kaicalan, wenang jadma inucap kasadokang ring Prajuru, lan katuwekang antuk madewa saksi ring Pura Bale Agung
- ( 5 ) Mangda nenten katuwekang manut ring ajeng, asing-asing ngranjing kapakubon jadma sewosan patut :
- a. Matengeran suara utawi makaukan
  - b. Nyantos sang nruwenang karang rawuh utawi masadok ring pangapit pinih tampek, maka buatan pangranjinge.
  - c. Pamedal karangnya kadagingin sawen, maka cihna pangarah rikala suwang.
- ( 6 ) Sang kahanan utawi sang manggihin Geni bhaya, patut nepak kulkul mapitulung manut pawos 16 (2) d.2.

Kaping 6

Panyanggran Banjar

Pawos 31

Krama Desa rikala ngawentenang karya suka-duka, patut kasangu olih sang nruwenang karya, luire :

- a. Prade ngawangun Panon Yadnya, manut pinunas sang

mayadnya katurang panyanggra manut pararem.

- b. Pangingu rikala Panca Yadnya, manut bobot-dangan karya utawi yadnya, prade sakeng semeng jantos wengi utawi sande katurang pangingu ping kalih.

#### SARGA IV

#### SUKERTA TATA AGAMA

Palet 1

Indik Dewa Yadnya

Pawos 32

- ( 1 ) Palinggih Panyiwiyen sawidangan Desa Adat Patolan, luire :
- a. Pura Kahyangan Tiga inggih punika : Pura Dalem lan Prajapati, Pura Puseh lan Panataran, Pura Desa lan Bale Agung
  - b. Pura Sedahan Banjar utawi melanting
  - c. Pura Sidempati.
- ( 2 ) Rahina Piodalan suang-suang Kahyangan inucap, kadi ring sor :
- a. Pura Dalem miwah Prajapati, rikala tilem wusan kuningan langkung ring tigang rahina
  - b. Pura Puseh miwah Panataran, rikala purnama wusan kuningan langkung ring tigang rahina
  - c. Pura Desa miwah Bale Agung lan Sedahan Banjar utawi Melanting, rikala rahina anggara kelion wuku tambir.
  - d. Pura Sidempati, rahina saniscara kelion wuku kuningan.
- ( 3 ) Pangaci ring Pura inucap, manut sastra Agama saha kalaksenayang Nista, Madya, Utama manut kawentenan miwah pararem.
- ( 4 ) Pangempon soang-soang Pura, manut dresta kadi ring sor :

- a. Kahyangan Tiga miwah Sedahan Banjar utawi melanting, kaempon olih Desa Adat Patolan
- b. Pura Sidempati inucap, kaempon olih tigang desa adat luire : Desa Adat Patolan, Desa Adat Sema miwah Desa Adat Pinda, tur pamarginya magilir utawi maputeran.

Pawos 33

- ( 1 ) Ring soang-soang Pura inucap kaadegang Pamangku.
- ( 2 ) Ngadegang Pemangku manut dudonan :
  - a. Turunan utawi ngawaris
  - b. Kacatri utawi kajudi olih Krama Desa Adat Patolan.
  - c. Nyanjan utawi masemurang, soang-soang mapiteges mapinunas ring ajeng Pura Panataran utawi kadura desa manawi ring balian konteng lan sapanunggalanya.
- ( 3 ) Tan kawenang anggen Pamangku luire :
  - a. Cadangga minakadi : peceng, perot, cungik lan sapanunggalanya
  - b. Sang sapa sira ugi sane tan kapatutang manut pararem
  - c. Sungkan ila, ayan, buduh wiadin edan
  - d. Sane madrebe kasucian urip tan becik.
- ( 4 ) Prabeya kapamangkuan :
  - a. Adiksa Widhi utawi ngawintenang, kamedalang saba kalaksanayang olih sang ngadegang, minakadi Krama Desa Adat Patolan magenah ring sinalih tunggil Kahyangan Tiga
  - b. Mapitra Yadnya riwekas Pamangku inucap patut kasungkemin tur kalaksanayang olih Krama Desa Adat, sanistanya antuk Brahma prayascita, panyanggrane manut pararem.

( 5 ) Pamangku patut ngamenggehang sasananing Pamangku,

manut sastra Agama luire :

- a. Tan wenang ajejudan
- b. Tan aparek ring naya dusta
- c. Tan atayub ring camarayudha
- d. Tan pati pikul-pikulan
- e. Tan ngranjing ring umah wong banya karma
- f. Ambek dharna sadu
- g. Makadang sastra utama
- h. Tan ngranjing ring umah wong drati krama
- i. Tan amangan lan anginum sahanan sane ngawe wra
- j. Tan wenang salab sulub
- k. Tan griguning wong akweh.

Pawos 34

Swadharmaning Pamangku luire :

- a. Ngenterang Upacara piodalan ring Kahyangan utawi ring soang-soang pakubon krama
- b. Prade salah sinunggil Pamangku kapialang utawi cuntaka, kengin nguntap Pamangku sewosan utawi nuwur Sulinggih.
- c. Yaning sampun Pamangku ngayah ring Pura kancit wenten kulawarganya kalayu sekaran, Pamangku inucap tan keni cuntaka, sakwanten nenten budal salami piodalan.

pawos 35

Patias utawi piilih-olihan Pamangku. luire :

- a. Panyolasan miwah sarin canang soang-soang pakubon Krama Desa lan punia wastra rikala wali ageng ring soang-soang Kahyangan
- b. Paupon palaba Pura minakadi carik utawi tegal manut pararem
- c. Luput kakaryan, rarampen, raramon lan pidagingan manut pararem.

## Pawos 36

( 1 ) Pamangku kagentosin riantukan :

- a. S e d a
- b. Pinunas ngraga, manawi kageringan lan sapanunggalanya
- c. Kawusan olih Krama, riantukan malaksana sane tan patut utawi asta dusta, manut sasananing Pamangku.

( 2 ) Prade Pamangku kawusang sangkaning tan patut palaksananya keni pamidanda manut pararem saha ngawaliang prabeaya pawintenan pecak.

## Pawos 37

Kasukertan Kahyangan kadi ring sor :

a. Tan kalugra nganjing ka Pura luire :

1. Sang kahanan cuntaka
2. Makta sahanan sane kasinanggeh ngeletehin
3. Sato ageng, sajawaning rikala mapapada
4. mabusana tan patut kadi tatacaraning ngranjing ka Pura
5. Sadereng polih uak-uakan utawi pituduh sakeng Prajuru Desa.

b. Pratingkahe tan wenang ring Pura :

1. Masumpah utawi cor, sajawaning pituduh Prajuru Desa
2. Makobetan, massenengan, makolem dados asiki lanang-wadon, mabacin, utawi mowiawihara, nyangsang busana, menahin pusungan, macecepin lan sapanunggalanya
3. Munggah tedun Palinggih, sajawaning pituduh Pamangku utawi Prajuru Desa.

c. Sang mamurug kecaping ajeng keni pamidanda pamrayascita sapatutnya, manut pararem.

## Pawos 38

- ( 1 ) Yaning weten jadma karawuhan ring Pura, kengin kapintonin prade rumasa kasumangsayan, yaning tan wyakti jadma inucap kasisipan manut pararem.
- ( 2 ) Prade Kahyangan kahanan durmangala minakadi bhaya, Pamangku utawi sang manggihin patut digelis nyadokang ring prajuru, Prajuru Desa mangda maruman Krama Desa tur ngawentenang pamrayascita sepatutnya.

## Palet 2

## Indik Resi Yadnya

## Pawos 39

- ( 1 ) Sang pacang madeg Pandita utawi Pinandita minakdi balian sonteng, kubayan, dalang sakaluring jagi ngenterang Yadnya, patut masadok ring Prajuru Desa kalih Parisada Hindu Dharma Indonesia.
- ( 2 ) Prajuru Desa patut nitenin tur naweng ngalangin prade wenten kacihnian esar kakecap muwah drestane, tur sareng nyaksinin upakara saha nyobyahang ring paruman Desa tegap rawuh ring wates kawenangan pangenter Yadnya.
- ( 3 ) Krama Desa patut ngaturang ayah sapatmadeg miwah ring panglepas sang Sulinggih riwekas katuntun olih Prajuru Desa.

## Palet 3

## Indik Pitra Yadnya

## Pawos 40

Pamargin Pitra Yadnya madudonan manut sakadi ring sor :

a. Pangupakaran sang kalayu sekaran :

1. Antuk mendem utawi ngeseng, maka cihna pakingsan ring Ibu Pertiwi utawi ring geni (Bhatara Brahma), selami nuptupang praboya

2. Atiwa-atiwa utawi Upacara Palebon.

- b. Upacara upacara Pitra Yadnya riwusan kaabenang mawestu munggah daun bingin utawi Nyekah.

Pawos 41

Swadarmaning lan tategenan prade wenten sinalih tunggil Krama kalayu sekaran :

a. Sang kadukitan patut :

1. Nyadokang ring Kelian Banjar tur nunas tatimbangan indik kawentenanya
2. Ngaturin Krama Banjar makarya eteh-ete saha kadulurin pangerombo nganter ka setra.

b. Banjar utawi Desa Adat :

1. Kelian Banjar maritatas pamargin sang kadukitan manawi kependem, makingsan riyin utawi nglantur kaabenang.
2. Prade sampun paritatas, raris kaswarayang kulkul patahu manut pawos 16 (2) e. olih Kelian Banjar utawi Patajuh.
3. Panyanggran Banjar utawi Desa Adat selanturnya :
  - a. Soang-soang Krama nedunin pasuka-duka utawi patus manut pararem
  - b. Ngarombo ngaryanang eteh-ete saha kasarengin olih krama sane rawuh maaksian
  - c. Krama Adat makasami nyarengan ka setra jantos upacara inucap puput.
- c. Tan kengin ngalelet langkungan ring pitung rahina, patut polih pagebagan sajeroning tigang rahina.
- d. Tan kalugra nginepang bangbang miwah mendem rikala : semut sadulur, kala gotongan, was panganten, pasah.
- e. Prade wenten kalayu sekaran rikala wenten piodalan, kengin mendem tan pasadok sakewanten rikala wengi ka setra.

- f. Yan wenten sinalih tunggil Krama seda, jagi kaabenang utawi kapalebun sajeroning Krama Desa ngawentenang dewa Yadnya patut pamutus ipun manut pararem.

## Pawos 42

- ( 1 ) Sane kasinanggeh Cuntaka kadi ring sor :

- a. Cuntaka antuk kalayu sekaran
- b. Cuntaka antuk ngraja swala
- c. Cuntaka antuk ngembasang putra
- d. Cuntaka antuk karuron
- e. Cuntaka antuk sungkan ila, buduh utawi edan
- f. Cuntaka antuk pawiwahan
- g. Cuntaka antuk gamia gamana
- h. Cuntaka antuk salah timpal
- i. Cuntaka antuk sang mobot nenten kaupakara
- y. Cuntaka antuk mamitra ngalang
- k. Cuntaka antuk ngembas putra nenten majalaran upacara pawiwahan minakadi pabeyakaonan miwah pawidhiwidanaan
- l. Cuntaka antuk Sad Atatayi minakadi : Agni, Wisada, Atharwa, Sastraghna, Dratikrama lan Raja pisuna.

- ( 2 ) Sasengker Cuntaka manut ring loka miwah Sastra Dresta :

- a. Cuntaka kalayu sekaran utawi seda luire :

1. Prade kapendem :

- a. Cuntaka mantuke ring Krama Desa Adat sengkernya, 3 rahina ngawit riwusan mendem tur sampun polih prayascita utawi malukat
- b. Cuntaka mantuke ring kulawarganya sajeroning pakarangan sengkernya, 42 rahina ngawit sakeng kalayu sekaranya.

## 2. Prade kaabenang :

- Cuntaka sang nyambut karya sengkernya, ngawit sakeng nanceb utawi nyambut karya ngantos riwus Yadnyanya ngelantur malih tigang rahina.
- b. Cuntaka ngrajaswala sengkernya, ngantos riwusan ngrajaswala.
- c. Cuntaka ngembasang putra sengkernya, 42 rahina ngawit embas tur sampun kaupakarayang makambuhan miwah maprayascita manut Dresta lan Agama.
- d. Cuntaka karuron sengkernya, 42 rahina ngawit karuron risampun matirta lan maprayascita.
- e. Cuntaka sungkan ila, buduh sengkernya, ngantos sasampune seger utawi kenak jati mula tur sampun kaprayascitayang.
- f. Cuntaka pawiwahan sengkernya, ngantos sesampune mapabeyakaonan utawi upacara pawiwahan.
- g. Cuntaka gamia gamana sengkernya, ngantos sasampune kapalasang utawi masapihan tur sampun kawentenang maprayascita raga lan prayascita Desa Adat miwah Kahyangan.
- h. Cuntaka salah timpal sengkernya, ngantos sasampune kapuputang manut Dresta lan Sastra Agama.
- i. Cuntaka sang mobot nenten majalaran upacara pawiwahan sengkernya, ngantos kawentenang upacara pawiwahan utawi pabeyakaonan lan prayascita.
- y. Cuntaka manitra ngalang sengkernya, ngantos kawentenang upacara pabeyakacuan tur prayascita.
- k. Cuntaka ngembas putra nenten majalaran upacara pawiwahan sengkernya, ngantos sang putra wenten mameras tur sampun kawentenang upacara manut

Dresta lan Sastra Agama Hindu.

1. Cuntaka Sad Atatayi sengkernya, ngantos sampun maprayascita raga tur nenten pisan dados ngamungganghang upacara padwijatian.

( 3 ) Sane kahanan Cuntaka luire :

a. Cuntaka kalayu sekaran :

1. Sang sane kalayu sekaran
2. Kulawarganya
3. Krama Desa Adat.

b. Cuntaka ngrajaswala : wantah sang sane ngraja swala.

c. Cuntaka ngembasang putra : Kulawarganya sane ngembas lanang lan istri miwah putra sane kaembasang.

d. Cuntaka karuron : wantah kulawarganya lanang miwah istri

e. Cuntaka sungkan ila miwah buduh utawi edan : wantah sane sang sungkan.

f. Cuntaka pawiwahan : wantah sang sane mawiwaha lanang miwah istri.

g. Cuntaka gamia gamana :

1. Sang sane malaksana gamia gamana inucap
2. Desa Adat miwah Kahyangan Desa.

h. Cuntaka salah timpal : sang sane malaksana salah timpal inucap.

i. Cuntaka sang mobot nenten majalaran upacara pawiwahan : wantah sang sane mobot kewannten.

y. Cuntaka mamitra ngalang : wantah sang sane ngelaksanayang kewannten.

k. Cuntaka ngembas putra nenten majalaran upacara pawiwahan :

1. Sang sane ngembasang putra

2. Sang putra sane kaembas

1. Cuntaka Sad Atatayi : wantah sang sane malaksana  
Sad Atatayi inucap.

( 4 ) Sane tan kahanan Cuntaka luire :

- a. Sang maraga Sulinggih.
- b. Sang maraga Pamangku Kahyangan.

Pawos 43

( 1 ) Atiwa-tiwa utawi pangabenan wenten tigang soroh  
luire :

- a. Sawa Prateka.
- b. Nyawa Resi.
- c. Suwasta.

( 2 ) Panamayan pangabenan wenten kakalih luire :

- a. Ngaben dadakan utawi bah-bangun, mangda sagelis-  
gelisnya, sajawaning wenten dewasa kekeran.
- b. Ngaben ngamasa sajeroning limang warsa utawi  
manut pararem.

( 3 ) Dudonan pangabenan : ngawit sakeng ngagah utawi  
seda, ngeseng miwah pangiriman utawi nganyut,  
ngelantur ngantos nyekah.

Pawos 44

( 1 ) Tatibakan papatusan pangabenan luire :

- a. Ngaben ngamasa, kalaksanayang olih Krama Desa  
Adat Patolan lan manut pararem.
- b. Ngaben dadakan, nenten polih patus.

( 2 ) Pangingune ring Krama Banjar, manut abot dangan  
kawentanan karya.

Palet 4

Indik Manusa Yadnya

Pawos 45

( 1 ) Manusa Yadnya inggih punika, Upacara-upakara  
dharmaning manusa, ngawit sakeng patemon kama bang

lan kama putih ring sajeroning garba, ngantos kalayu sekaran riwekas.

- ( 2 ) Upacara-upakara inucap madudonan kadi ring sor :
- a. Magedong-gedongan, duk pangrempinian ibiyang.
  - b. Duk sang kama reka medal
  - c. Kepus odel
  - d. Roras rahina
  - e. Tutug kambuhan ( 42 rahina ).
  - f. Masambutan ( 3 sasih ).
  - g. Ngotonan, odalan ( 6 sasih ).
  - h. Tutug kelih minakadi, ngraja wadone utawi ngembakang lanange.
  - i. Matatah utawi mapandes.
  - y. Mawiwaha.
  - k. Mawinten.
  - l. Manut daging lontar Jadma Prawerti.
- ( 3 ) Upacara-upakara inucap nganutin : nista, madya lan utama manut Dresta miwah Sastra Agama.

Palet 5

Indik Bhuta Yadnya

Pawos 46

- ( 1 ) Bhuta Yadnya inggih punika : Upacara upakara pabeyakalaan ring Pratiwi, Nahvangan, sarwa Prani miwah ring babhutan.
- ( 2 ) Upacara pabeyakalaan ring sarwa prani miwah piranti :
- a. Ring sarwa tumuwuh rikala tumpek pengatag utawi saniscara kliwon wariga.
  - b. Ring sarwa ingon-ingon : rikala tumpek andang utawi saniscara kliwon uye.
  - c. Ring sarwa lalandep, rikala saniscara kliwon landep.
  - d. Ring sarwa lalangan, rikala saniscara kliwon krulut.

- e. Ring sarwa raringgitan, rikala saniscara kliwon wayang.
  - f. Ring sarwa siandana, rikala saniscara kliwon kuningan.
  - g. Ring manusa, manut widana inggih punika kabawos pabeyakala.
- ( 3 ) Upacara pabeyakala ring pratiwi, Kahyangan lan Babhutan kawastanin macaru.
- ( 4 ) Pacaruan inucap nganutin nista, madya lan utama manut wigunanya kadi ring sor :
- a. Eka sata.
  - b. Panca sata.
  - c. Panca sanak.
  - d. Rsi gana.
  - e. Tawur agung.
  - f. Panca kelud.
- ( 5 ) Sajawaning kadi ring ajeng kawentenang upacara-upakara :
- a. Masaiban utawi Yadnya sesa nyabran wusan ngeratengan.
  - b. Masapuh-sapuh rikala pacang wali utawi odalan ring Pura utawi ring sajeroning Kahyangan.

## Pawos 47

- ( 1 ) Nyabran ngawarsa rikalaning tilem kasanga kawentenang tawur kasanga, maka cihna pacang nyanggra rahina panyepian benjangnya.
- ( 2 ) Upacara panyepian sane kamargiang olih Krama Desa, nganutin Catur Brata panyepian luire :
- a. Amati geni
  - b. Amati karya
  - c. Amati lalangan
  - d. Amati lalungan.
- ( 3 ) Pabratan inucap kamargiang sakeng semeng ngantos semeng benjangnya.
- ( 4 ) Sang mamurug kecaping ajeng, keni pamidanda manut pararem.
- ( 5 ) Riwus rahina panyepian utawi benjangnya maka cihna

pangawit icaka warsa, patut soang-soang Krama Desa madharma shanti.

SARCA V

SUKERTA TATA PAWONGAN

Palet 1

Indik Pawiwahan

Pawos 48

- ( 1 ) Pawiwahan inggih punika, patemoning purusa-pradana malarapan antuk panunggalan kayun suka saha kadulurin upasaksi sakala miwah niskala.
- ( 2 ) Pamargin pawiwahan luire :
- a. Papadikan, kamanggala antuk pakrunayan
  - b. Ngarorod, merangkat riin wawu kakrunayang
  - c. Nyeburin utawi sentana nyeburin.
- ( 3 ) Paridabdab sang pacang mawiwaha patut :
- a. Sampun manggeh deha-taruna utawi prasida nganutin undang-undang sakeng sang ngawawenang
  - b. Sangkaning pada lila utawi tan kapaksa
  - c. Manut kecaping Agama utawi tan gamia gamana
  - d. Kasudi wadhani prade pangambile sewos Agama miwah kapatiwangi prade pangambile singgihan wangsa.
- ( 4 ) Pamargin pawiwahan mangda taler nganutin undang-undang pawiwahan sakeng sang ngawawenang.

Pawos 49

- ( 1 ) Pawiwahan sane kapatutang ring Desa, sakadi ring sor :
- a. Sampun ngamargiang pabeyakalaan utawi pasakapan, kasinaksiang sakala-niskala olih Pandita utawi Pinandita
  - b. Wenten Upasaksi Prajuru sane mapakelingan utawi ngilikitayang pawiwahanya.

- c. Sampun matengeran suara kulkul manut pawos 16  
(2) o.

( 2 ) Parabian sane tan manut kadi ring ajeng sinanggeh  
tan patut utawi tan sah.

Tata caraning parabian patut kadi ring saw :

a. Sapasira ugi ngewarangan pakowargan patut  
masadok ring Prajuru, salanturaya Prajuru  
maritatas manut tan manut kakecap parabiannya.

b. Pamargin papadikan manut dudonan :

1. Pakrunan ngantos ping tiga, saha soang-soang  
malarapan :

a. Kapertama makta suwar miwah canang

b. Kaping kalih makta suwar miwah canang

c. Kaping tiga makta suwar miwah pejati,  
kabawos pamuput papadikan.

2. Risampun puput babawos papadikanya raris sang  
istri kaajak budal ring pakubon sang lanang,  
saha kadulurin antuk pabeyakalaan.

3. Mangda puput tegus nekala miwah niskala,  
kulawarga sang purusa taksa, pejati ring  
pamrajan sang pradharanya.

c. Prade ngarorod utawi marangkat patut :

1. Raraman sang purusa ngawontenang pamilaku  
antuk duta sakirangnya kalih diri.

2. Pagenanan antene tan kengin ring pakubon sang  
purusa utawi sang lanang, sodereng kawenten-  
ang pabeyakalaan.

d. Sajeroning pakrunan utawi panglakuan patut :

1. Kamanggala antuk geng rema sinampura marep  
ring wadone utawi sang pradana.

2. Kaigumang idih-pakidih utawi palegayan arep  
ring paswakan sang ngidih, saha dewasa  
pakerab-kambeyanya riwahas.

3. Kahcinayang kapurusa, utawi prade sentana rajeg kajejerang patut ngidih anak lanang kabawos pawiwahan nyeburin
4. Prade tan katrima pajatine, pakrunan tetep kamargiang ping tiga.
- e. Pakerab kambeyan mapiteges upacara tinas apadang, dwaning manut sekadi ring sor :
  1. Sajeroning kabawos ambe, kalaksanayang ring sekala miwah niskala antuk sarana jajauman miwah pawidhi widana :
    - a) Jajauman pinaka ngambe utawi ngadungan kayun soang-soang pakulawarga sang predana
    - b. Pawidhi widana pinaka pejati nunas sang pradana ring pamrajan kamulanya.
  2. Sajeroning kabawos kerab ring sakala :
    - a) Antuk upasaksi Krama Banjar
    - b) Antuk upasaksi Prajuru, saha ngilikitayang.

Palet 2

Indik Nyapihan

Pawos 51

- ( 1 ) Parabian prasida kawusan malarapan antuk palas parabian utawi salah sinunggil padem utawi seda.
- ( 2 ) Wusan marabian riantukan salah sinunggil seda mapiteges balu makadi balu lanang miwah istri.
- ( 3 ) Palas marabian, sangkaning mawit wicara.
- ( 4 ) Sang ayat palas marabian patut atur sepeksa pailikitaan riyin ring sang rumawos wastu tinas apadang kaputuse kabawos nyapihan, wawu Prajuru nyobyahang kawentenanya ring Desa saha keni pamidanda pamelin suara kulkul manut pararem.

Pawos 52

Tata cara palas marabian kadi ring sor :

SALINAN AWIG-AWIG DESA ADAT PATOLAN

- a. Nawur prabeya upasaksi sinalih tunggil pada matenga.
- b. Pagunakaya polih pah-pahan pada.
- c. Pabekel tatadan, soang-soang kakuasa niri-niri muah warisan kakuasa olih sang purusa.
- d. Ngaweruhin miwah ngupajiwen pratisentana manut swadharmaning guru rupaka.
- e. Nawur pamidanda pamelin suara kulkul manut pararem.
- f. Ngelung jinah lokika.

## Pawos 53

Prade sang palas riwekas kacihnian adung malih, patut :

- a. Ngelaksananyang Upacara pawiwahan malih.
- b. Kadanda nikel sakeng palase.

## Pawos 54

( 1 ) Sang balu kabinayang dados :

- a. Balu istri wit sentana utawi sentana rajeg miwah balu istri boya sentana.
- b. Balu lanang wit sentana utawi purusa, miwah balu lanang nyeburin utawi boya sentana.

( 2 ) Swadarmaning balu inucap patut :

- a. Ngamanggehang pati brata, tan kengin ngamargiang paradara utawi drati krama.
- b. Nguasayang waris pagunakaya, tan dados ngadol, ngadeang lan makidihang miwah sewosan makadi punika, sajawaning sampun kadadosang olih pewaris makadi pianak utawi kulawarga pinih tampek prade sang pianak utawi okanya kantun malit.
- c. Kawenangan mawiwaha malih, prade wenten pamutus manut aksara b. ring ajeng.

## Pawos 55

Balu kaucap tan pageh sekadi ring sor :

- a. Drati krama utawi paradara.

- b. Matilar sakeng pakubon tan pasadok 6 (enem) sasih.
- c. Lempas ring swadharmening sewos-sewosan, tan prasida ngesehin solah maprawerti marep ring kulawarga purusa sane patut.

## Palet 3

## Indik Santana

## Pawos 56

- ( 1 ) Sentana wenten kalih soroh inggih punika :  
Pratisantana miwah santana paperasan.
- ( 2 ) Pratisantana inggih punika, santana sane metu sakeng pawiwahan sane patut utawi sah.
- ( 3 ) Prade wenten santana metu sakeng pawiwahan sane tan patut, patut kamanggala antuk panyengaskara mangda tan kantun mawasta babinjat utawi astra.
- ( 4 ) Prade pawiwahanya tan ngawetuang santana, kengin ngidih santana antuk upasaksi sekala miwah niskala, mawasta santana paperasan.
- ( 5 ) Santana rajeg inggih punika, pratisantana wadon sane kamanggehang purusa tur risampun ngelaksanayang pawiwahan nyeburin.
- ( 6 ) Sang sane dados kaarsayang sentana rajeg inucap wiwit angka lima ring ajeng, inggih punika :
  - a. Pratisantana wadon tunggal.
  - b. Sampun kamanggehang dados pratisantana purusa.
  - c. Sampun ngelaksanayang pawiwahan kaceburin, kautamayang antuk jadmā sane magama Hindum utawi jadmā magama sewosan nanging sampun kalaksanayang eudiwadana.
  - d. Sane ngamanggehang santana rajeg, patut mapasadok ring Prajuru Adat tur Prajuru Adat nyobyahang ring Krama Desa Adat.

## Pawos 57

- ( 1 ) Ngangkat santane manut dudonan patut mecihna harta brana pamerasan sane kasinaksiang sekala miwah niskala.
- ( 2 ) Sapasira ugi Krama pacang ngidih santana, patut masadok ring Prajuru Desa sanistanya 3 (tigang) sasih sadereng pamerasan.
- ( 3 ) Prajuru Desa nyobyahang ring Krama Desa, sang sapasira ugi rumaksa tan lila mangda nyadokang ring Prajuru masengker kalih wuku utawi 14 rahina sabanen upacara pamerasan kalaksanayang.
- ( 4 ) Prajuru digelis mawosin saha ngicening pamutus nepek Dresta muwah pararem.
- ( 5 ) Prade sulur pamerasanya tan manut kecap ring ajeng, Prajuru Desa wenang ngandeg sang pacang makarya saha ngicen panuntun mangda kapuputang riyin sulur utawi wicaranya.

## Pawos 58

- ( 1 ) Pamerasang sane kapatutang ring Desa risampun makacihna :
  - a. Widhi widana pamerasan.
  - b. Kasinaksiang olih Prajuru Desa sane makelingan utawi ngilikitayang, tur kasobyahang ring Krama Desanya.
- ( 2 ) Sane patut kaperas anggen santana makadi ring sor :
  - a. Jadma sane magama Hindu.
  - b. Papernahan nedunang sakeng sang meras
  - c. Kulawarga sakeng purusa, prade tan wenten kengin sakeng wadon utawi pradana, yening taler tan wenten wawu kengin sakama-kama utawi sakeng kayun.
  - d. Kautamayang sakeng waris pancor kapurusa.

e. Sinalih tunggil mawiwit sakeng kulawarga tunggal sanggah utawi pamrajan, paibon lan dadya utawi anak sewos sake wanten magama Hindu.

( 3 ) Kengin ngangkat santana langkung ring adiri, lanang lan wadon.

Palet 4

Indik Warisan

Pawos 59

( 1 ) Warisan inggih punika, tatamian harta brana miwah harta pusaka saha ayah-ayahan, ngupadi kasukertan Sekala miwah niskala sakeng kaluhuranya marep ring turunanya.

( 2 ) Kang sinanggeh warisan luire :

a. Duwe tengah makadi, karang ayahan Desa, pusaka, siwa krana lan sapanunggalanya.

b. Pamerajan.

c. Pagunakayan, tatadan utawi jiwa dana, utang-piutang.

( 3 ) Wawu kengin kabawos warisan parade wenten :

a. Sang mapiturun utawi pawaris.

b. Katurunan utawi ahli waris.

c. Harta brana miwah tategenan utawi ayah-ayahan macihna warisan.

Pawos 60

( 1 ) Ahli waris luire :

a. Pratisantana purusa.

b. Pratisantana wadon utawi santana rajeg.

c. Santana paperasan lanang utawi wadon.

( 2 ) Prade tan wenten kadi ring ajeng, kang sinanggeh ahli mwaris :

a. Turunan purusa pernah ngunggahang makadi, raramanya, pekaknya salantur ipun rarama misan mindon.

- b. Turunan purusa pernah kasamping makadi, kaponakan misan miwah mindon.
- c. Yan kulawarga inucap putung utawi camput, Karang Desane kaamong patut kasukserahang ring Desa Adat.

## Pawos 61

Swadharmaning ahli waris patut :

- a. Narima saha ngawasayang tatamian pahan sakeng kulawarganya makadi, ngarompon sanggah utawi Pamrajan, pura saha pangupakaranya muwah nyeledihin ayah-ayahan pewaris.
- b. Ngabenang pewaris saha ngelantureng upacara-upakara Pitra.
- c. Nawurin utang-utang pewaris sane manut pangelokika.

## Pawos 62

Pangepahang waris manut kadi ring sor :

- a. Risampun kalaksanayang Pitra Yadnya lan utang-utang pawaris buntas katawur.
- b. Para ahli waris polih pahan pada sangkaning pagunakayan, sajawaning punika karang ayahan Desa polih pada ngamong mamargi kadi patut manut Dresta.
- c. Sinalih tunggil ahli waris kengin tan polih pahan prade :
  - 1. Ninggal kawitang lan sasananing Agama.
  - 2. Alpaka guru rupaka
  - 3. Santana rajeg utawi pratisantana nyeburin kesah mawiwaha soang-soang kabawos ninggal kadaton.
- d. Boya ahli waris kengin muponan hasil manut dudonan :
  - 1. Santana wadon, salami dereng kesah mawiwaha miwah tan alpaka guru, prade madrebe pianak utawi oka tan kaangkening olih wong tuwo rare punika kengin ngawaris pikolih utawi pagunakayan santana luh

- inucap kamawon.
2. Balu wadon miwah balu lanang nysburin utawi soang-soang boya santana.
  3. Mulih deha-taruna, riantukan pawiwahanya pecak kabawos sampun ninggal kadaton.
- e. Pawaris kengin maweweh rikala maurip pinaka jiwa dana, tatadan utawi bekel makacihna tetep ring santana sane kesah mawiwaha.

## Pawos 63

- ( 1 ) Prade sajeroning kulawarga wenten ahli waris langkungan ring adiri patut kadi ring sor :
- a. Ngawentenang paigam indik padum waris inucap.
  - b. Yan tan prasida, mangda katunasang tatimbang ring Prajuru utawi kerta Desa.
  - c. Prade taler tan wenten cumpu ring panepas kerta Desa, kengin katunasang ring sang rumawos.
- ( 2 ) Prade pangemong karang ayahan Desa inucap kaputungan, patut Prajuru nibakang ring :
- a. Sang sinanggeh ahli waris manut pawos 60 (2).
  - b. Sang kengin anggen santana manut pawos 56.
  - c. Prade tan kacumpu ring panepas kerta Desa, kengin katunasan ring sang rumawos.
- ( 3 ) Prade Karang Desa kaepah, patut soang-soang nedunin ayah Krama Desa.

## SARGA VI

## WICARA LAN PAMIDANDA

## Falet 1

## Indik Wicara

## Pawos 64

- ( 1 ) Sane wenang mawosin makadi mutusang wicara ring Desa, inggih punika, Prajuru Desa kang sinanggeh kerta Desa.

- ( 2 ) Prade sang mawicara tan wenten cumpu ring pamutus kerta Desa, kengin nunasang wicara inucap ring sang rumawos.

Pawos 65

- ( 1 ) Sahanan wicara mawiwit, kacorahan sakaluire sinanggeh nungkasin daging Awig-awig, pararem miwah paswaran Desa utawi Banjar, Prajuru patut digelis mawosin tan nyantos pasadok.
- ( 2 ) Sajaba wicara ring ajeng, patut nyantosang pasadok sang nunas bawos.
- ( 3 ) Panepase patut pastika nyantenang iwang-patut malarapan Tri Pramana minakadi bukti, saksi, ilikita miwah tan maren nepek catur Dresta.

Palet 2

Indik Pamidanda

Pawos 66

- ( 1 ) Desa utawi Banjar wenang nibakang pamidanda ring Krama Desa utawi Banjar sane sisip.
- ( 2 ) Paniwak inucap kalaksanayang olih Bandesa utawi Kelihan Banjar.
- ( 3 ) Bacakan pamidanda luire :
- a. Ayahan panukun kasisipan.
  - b. Danda harta saba panikel-panikelnya miwah panikel urunan.
  - c. Kadaut karang ayahanya.
  - d. Kanoroyang.
  - e. Panyangaskara.
- ( 4 ) Pamidanda sane katiwakang, patut masor-singih manut ring kasisipanya.
- ( 5 ) Pamidanda raja brana, nganjing dados padruwen Desa utawi Banjar.

## Pawos 67

- ( 1 ) Krama sane langkung ring tigang paruman ngalantur tan nawur urunan miwah dadandan, wenang karampag.
- ( 2 ) Parampagang ngangge tata cara sakadi ring sor :
- a. Kalaksanayang olih Prajuru kasarengin antuk Krama, sakwehnya tigang diri maka saksi.
  - b. Sang ngrampag sangkaning darsana, ngambil barang utawi nyawenin tanem tuwuh akehnya manut ring utang sang karampag.
  - c. Prajuru miteketang mangda barang utawi tanem tuwuh sane karampag digelis katebus, masenger awuku utawi 7 (pitung) rahina, ring 8 (kutus) rahinanya kaadol.
  - d. Tan nganinin saluirin sane patut nginggilan manut Agama miwah mademang pangupa jiwa sang karampag.

## Pawos 68

- ( 1 ) Prade sang karampag ngawara utawi ngalangin pamargin inucap mawastu sampun tan nganutin Awig-awig Desa, wenang karang Desa sane kagenahin kadaut antuk Desane.
- ( 2 ) Yan purun taler ngalangin pamargin sakadi ring ajeng, tan wenten pamargi sajawanang kanoroyang olih Krama Desa.
- ( 3 ) Pamidanda inucap ring ajeng kabawos buntas, risampun sang kakenin :
- a. Nunas geng pangampura ring Krama Desa, riantukan nguwak pasubaya utawi pararem pecak.
  - b. Nawur pangangan panguwak duk pacang karampag, kadulurin prayascita panyaksi kaiwangan ring Desa.

## SARGA VII

## NGUWAH-NGUWAH AWIG-AWIG

Pawos 69

- ( 1 ) Nguwah-nguwuhin Awig-awig Desa puniki, kalaksana-  
yang olih paruman Desa.
- ( 2 ) Awig-awig puniki kamargiang ngawit kaingkupin utawi  
kararemin.

Pawos 70

- ( 1 ) Saluwiring sane wenten saderengnya, patut  
kaanutang ring sadaging Awig-awig puniki.
- ( 2 ) Saluwiring sane durung kabawos ring sajeroning  
Awig-awig puniki, patut kamargiang manut dresta  
miwah pararem Desa.

## SARGA VIII

## P A M U P U T

Pawos 71

- ( 1 ) Awig-awig puniki kararemin duk rahina : Sukra wage,  
Wuku : krulut, Pananggal : ping tiga, Sasih :  
kadasa, Icaka wara : 1915, utawi tanggal : 26  
Maret 1993 maschi, ring Balai Banjar Patolan.
- ( 2 ) Awig-awig puniki kalinggatanganin olih Bandesa  
kasarengin Kelihan Adat Patolan, saha kesaksinin  
olih Prajuru Dinas.
- ( 3 ) Luir sang ngalinggatanganin :  
a. Prajuru Desa Adat Patolan

Kelihan Adat Patolan,  
t.t.d.

Bandesa Adat Patolan,  
t.t.d.

Drs. I Nyoman Sulitra.

I Made Selamat.

## b. Prajuru Dinas :

Kepala Desa Pering,

t.t.d.

I Made Kartana.

Kepala Dusun Patolan,

t.t.d.

Drs. I nyoman Sulitra.

Camat / Kepala Wilayah

Kecamatan Blahbatuh,

t.t.d.

I Dewa Putu Pariwesa, BA

NIP. 600004825

MRNGETAHUI DAN TELAH DICATATKAN  
 PADA TANGGAL : 21 JANUARI 1994  
 N O M O R : 2 TAHUN 1994  
 BUPATI KEPALA DAERAH TINGKAT II GIANYAR

T.I.D.

TJOKORDA GDE BUDI SURYAWAN, SH